



HUNTO PA ARUBA

ACUERDO DI FORMACION
ENTRE PARTIDONAN
MEP - POR - RED



ARUBA
OCTOBER 2017

ACUERDO DI FORMACION 2017
entre partidonan MEP, POR y RED
relaciona cu periodo di gobernacion 2017-2021

ARUBA, OCTOBER 2017



ACUERDO DI FORMACION 2017

entre partidonan MEP, POR y RED
relaciona cu periodo di gobernacion 2017-2021

E resultado di eleccion di dia 22 di september 2017, a duna e partidonan MOVIMIENTO ELECTORAL DI PUEBLO (MEP), PUEBLO ORGUYOSO Y RESPETA (POR) y RED DEMOCRATICO (RED) un mayoria di 12 asiento den Parlamento di Aruba.

Considerando cu mediante dicho eleccion mayoria di e pueblo votado a expresa su deseo pa un cambio, no solamente di gobernacion, pero principalmente di e rumbo di nos pais, e partidonan ariba menciona ta expresa e deseo pa forma un gobierno serio y stabiel pa e periodo 2017-2021 basa riba e siguiente puntonan di salida.

E partidonan MEP, POR y RED a dicidi pa pone man na obra pa brinda pueblo di Aruba un gobierno basa riba bon gobernacion, transparencia, integridad, finanzas publico responsabel y desaroyo sostenibel, cu tin como meta pa pone e ser humano central y traha unicamente pa bienestar general di henter nos comunidad.

E partidonan firmante ta reconoce e necesidad di un investigacion haci pa un entidad of organisacion independiente y ta aproba e proposicion haci pa Sr. Gobernador di Aruba pa laga haci un investigacion financiero na unda lo inventarisa e situacion y riesgonan financiero di nos pais y presenta un rapport cu lo contene un bista real di gastonan pendiente y debenan hereda di e Gabinete actual (2009-2017). Pa loke ta e analisis di riesgonan financiero ta pensa por ehempel riba PPP, AZV, SVB y refineria. Alabes lo laga haci un investigacion amplio den tur departamento y companianan gubernamental cu ta sensitivo pa corrupcion (“fraudegevoelig”), pa di e forma aki yega na medidanan apropiada di eficiencia, “checks and balances”, “auditing” y relatonan administrativo y financiero riba un base regular.

E acuerdo di formacion pa e periodo di gobernacion 2017-2021 ademas ta basa riba e siguiente prioridadnan y puntonan di salida:

1. **BON GOBERNACION:** E calidad di nos democracia y nos institutonan democratico ta depende di un structura transparente, basa riba proteccion di derechonan humano, respet pa e necesidadnan y libertadnan di nos ciudadanonan, fortificacion di nos estado di derecho y instancianan di control, responsabilisacion y bon gobernacion (“accountability and good governance”), como tambe eliminacion di corrupcion y discriminacion. Pero mas cu tur cos, democracia di nos pais y bon gobernacion ta depende di e capacidad y integridad di esnan cu ta ocupa posiconnan clave den e structura y institutonan menciona, na unda gobernantenan ta responsabilisa nan



mes pa nan actonan y funcionamiento den e aparato gubernamental. Den esaki Parlamento mester cumpli debidamente cu su tarea di controla gobierno. Ademas lo institui un departamento pa promove integridad gubernamental (“Bureau Integriteit”).

2. **FINANZAS PUBLICO BALANSA Y DURADERO:** E meta principal ta pa den un forma responsabel trece un balance den nos finanzas publico pa awor y pa nos futuro generacionnan. Pa logra esaki lo reduci nos debe nacional na un nivel manehabel, lo baha gastonan innecesario y lo restructura e sistema di impuesto (reforma fiscal) pa esaki bira uno mas simpel pa ehecuta y mas husto pa e pagador di impuesto. Esencia di e reforma fiscal ta pa reduci e peso di impuesto, di directo pa indirecto, cu e meta di entre otro logra mehora poder di compra, eficiencia y transparencia. Pa garantiza transparencia y efectividad di e procesonan financiero lo institui un “Begrotingskamer”.
3. **E SER HUMANO CENTRAL:** E ser humano y su derechonan fundamental lo wordo poni central den e maneho di e proximo gobierno y esaki lo ta visibel principalmente riba e siguiente terenonan:
 - a. **SIGURIDAD:** Lo enfoca riba e trankilidad di cada ciudadano. Pa logra esaki e prioridad number un ta pa combati criminalidad cu tur forsa y haci Aruba sigur atrobe. Den e maneho lo duna mas atencion na e aspecto preventivo (prevencion social) cu esun represivo. Nos lo intensifica control na nos fronteranan pa reduci importacion ilegal di arma, droga y persona te na un minimo. Nos lo inverti den nos cuerponan di seguridad, dunando nan material y personal pa por combati criminalidad efectivamente. Nos lo revisa nos leyman pa brinda nos cuerponan di seguridad e cuadro legal pa haci Aruba mas sigur y pa brinda nos ciudadanonan proteccion legal y hudicial.
 - b. **ASISTENCIA SOCIAL:** Pa e ser humano wordo poni central, mester pone atencion na e problemanan social den nos comunidad cu ta ser ocasiona pa varios factor. Esnan mas serio ta entre otro abuso sexual, emocional y fisico di mucha, problemanan financiero, problemanan di adiccion y problemanan den famia. Problemanan social lo wordo enfrenta hunto cu e organisacionnan activo den e ramo social pa combati esaki efectivamente den un fase trempan, dunando mas atencion na mamanan soltero y problemanan den famia, pa asina nos por brinda nos muchanan y hobennan mas proteccion y mas perspectiva den bida.
 - c. **BIENESTAR ECONOMICO:** Lo hiba un maneho pa salvaguardia un nivel halto di calidad di gobernacion pa un desaroyo economico sano y duradero den tur



districto, creacion di mas oportunidadnan pa inversion y pa empleo di calidad y na mes momento baha costo di bida y mehora poder di compra di tur ciudadano. Den e cuadro aki mester reduci e “cost of doing business” na Aruba y lo introduci un ley di restauracion economico pa reduci red tape y burocracia. Esaki ta necesario pa un clima di inversion sano cu lo conduci na crecemento y diversificacion economico, cu no ta un meta riba su mes, sino ta e caminda pa logra e meta principal cu ta mas cupo di trabou y mas oportunidad empresarial, pa asina crea mas bienestar den cada hogar. Pa loke ta e pilar economico principal di nos pais, esta turismo, enfoke lo ta riba promocion di turismo di calidad.

- d. **DESARROYO SOSTENIBEL:** Esaki ta encera un desaroyo economico y social cu ta bay man den man cu proteccion di nos naturalesa y medio ambiente, mediante un ley di zonificacion (ROPV) y leyman moderno di medio ambiente. Hunto cu e leyman aki lo introduci mecanismonan di control y sancion efectivo.
- e. **ENSEÑANSA DI CALIDAD:** E enfasis ta pa trece innovacion den nos sistema di enseñansa pa prepara nos hobennan pa e economia di futuro y pa drenta e mercado laboral. E meta principal ta pa tin menos dropouts y mas graduado. Docentenan lo haya asistencia y apoyo, mientras cu infraestructura di scolnan lo haya atencion debido. Unda ta necesario lo construi scolnan nobo pa garantiza cu tin suficiente cupo pa tur estudiante. Enseñansa lo bira accesibel pa tur estudiante y den e cuadro aki ta considera introduccion di enseñansa gratis.
- f. **CUIDO DI NIVEL HALTO:** Punto di salida ta cu cuidado medico no mag wordo nenga pa motibonan financiero y cu mester trece e cuidado mas cerca di e pashent. Lista di espera mester wordo corta te na un minimo y nos dokternan studia den region cu ta cualifica mester wordo permiti pa traha na Aruba. Den e cuadro aki lo cambia ley unda ta necesario. Lo enfoca mas riba prevencion, cu riba termino largo ta e unico solucion pa baha e gastonan halto den cuidado medico. Banda di remedi di tera lo implementa e proceso pa legalisacion di cannabis medicinal. Ademas lo decentralisa cuidado medico pa e pashent por tin mas escogencia y adicionalmente lo mehora y amplia cuidado mental y e sistema di cuidado pa nos grandinan.
- g. **VIVIENDA PA UN Y TUR:** Prioridad ta pa cada famia tin un vivienda, sea ta vivienda social of vivienda na costo modera of tereno pa por construi su propio vivienda.



E puntonan den e acuerdo di formacion aki, como tambe otro puntonan di atencion manera por ehempel infraestructura, deporte, transporte y comunicacion sector primario, asuntonan di Reino, migracion y integracion, energia sostenibel, y cultura, lo keda amplia y elabora den e Programa di Gobernacion 2017-2021.

AG

Lider Politico di MEP
Wever-Croes, Evelyn C.

Lider Politico di POR
Oduber, Otmar Enrique

Lider Politico di RED
Croes, Ricardo Sindulfo

Aruba, 17 october 2017